



Kamis, 07 Januari 2021

Ogen: Masmur 84:12-13



Malem Atendu, Aloken Si Mehuli



Berharap senyuman awal tahun baru akan datang lalu berbisik "ini akan lebih berbahagia" enda me sada kata motivasi si isuratken Alpret Lord. Kata siisuratkenna enda nuriken sada pengarapen si mbelin si iarapken manusia i bas mengketi tahun si mbaru. Tahun 2021 enggo sialoken, sibengketi alu dem keriahen sabab ibereken Dibata denga kita wari-wari kegeluhen si banci sinanami, sibentasi dingen si isi alu mehuli. Amin la sitik tantangan, perbeben ntah pe kebiaren si reh ras sijumpai i bas tahun si lepas tapi i bas perkuah ate Dibata banci sialoken tahun enda dingen wari enda alu dem keriahen. I bas si enda kita tetap ngataken bujur man Dibata si empuna kegeluhen enda.

Arapen ras totonta maka wari si sendah ulin asangkan si nderbih, tahun enda lebih mereken kemalemen ate asangkan tahun-tahun si enggo lepas. Tentunya si enda banci sinanami ras aloken dikune Dibata tetap masu-masu kita janah i bas ndalani kegeluhenta pe tetap kita erjuang asa ngasup ras gegeh dingen ersukuten ku bas gegeh Tuhan i bas kerina paksa ras kerina dahinta.

Pemasmur i bas ketedeheh atena nandangi rumah Tuhan tetap muji Dibata seumur geluhna. Kerina e ilakokenna erkiteken igejabna maka Tuhan e desken matawari ras ampang-ampang si enteguh man bana. Matawari ulu terang, symbol wari simbaru, kenca pultak matawari arah kenjulu I je me wari si mbaru ialoken. Janah e arapen si mbaru ibenaken. Dibata pe desken ampang-ampang si enteguh, si njagai geluhnta i bas ngalaken erbage situasi. Dibata la rahan-ahan mereken lias ateNa dingen kerina si mehuli man anak-anakNa. Enda ka me si jadi gelementa ndalani tahun 2021 enda, i bas wari si pepituken gejablah dingen nanamilah kerina perbahanen Dibata si mehuli i bas geluhnta.

Dibata ulu kemalemen ate, penanam-nanamlah!